


Te mahere ā-rohe o Papakura 2020

He aronga poto i tā mātou mahere



Mihi

Tēnā kia hoea e au taku waka mā ngā tai mihi o ata e
uru ake ai au mā te awa o Tāmaki
ki te ūnga o Tainui waka i Ōtāhuhu.
I reira, ka toia aku mihi ki te uru ki te
Pūkaki Tapu a Poutūkeka,
i reira, ko te Pā i Māngere.
E hoe aku mihi mā te Mānukanuka o Hoturoa
ki te kūrae o Te Kūiti o Āwhitu.
I konā, ka rere taku haere mā te ākau
ki te pūaha o Waikato, te awa tukukiri o ngā tūpuna,
Waikato Taniwharau, he piko he taniwha.
Ka hīkoi anō aku mihi mā te taha whakararo
mā Maioro ki Waiuku ki Matukutūreia
kei konā, ko ngā Pā o Tahuna me Reretewhioi.
Ka aro whakarunga au kia tau atu ki Pukekohe.
Ka tahuri te haere a taku reo ki te ao
o te tonga e whāriki atu rā mā runga i ngā hiwi,
kia taka atu au ki Te Paina,
ki te Pou o Mangatāwhiri.
Mātika tonu aku mihi ki a koe Kaiaua
te whākana atu rā o whatu mā Tīkapa Moana
ki te maunga tapu o Moehau.
Ka kauhoetia e aku kōrero te moana
ki Maraetai kia hoki ake au ki uta ki Ōhuiarangi, heteri
mō Pakuranga.
I reira ka hoki whakaroto ake anō au
i te awa o Tāmaki mā te taha whakarunga
ki te Puke o Taramainuku, kei kona ko Ōtara.
Kātahi au ka toro atu ki te Manurewa a Tamapohore, kia
whakatau aku mihi mutunga
ki runga o Pukekiwiriki
kei raro ko Papakura
ki konā au, ka whakatau.

Kei tēnei puka te whakarāpopotohanga o te Mahere Poari ā-Rohe. Toro atu ki te paetukutuku o Te Kaunihera o Tāmaki Makaurau,
www.aucklandcouncil.govt.nz mō te roanga ake o te mahere.

He kōrero nō te Heamana

Nōku te maringanui ki te whakatakoto i tēnei mahere poari ā-rohe e whakarārangi ana i ngā wawata mō te rohe o Papakura.

I whai wāhi atu ngā whakaaro me ngā tirohanga o ngā hapori ki tēnei rautaki, he rautaki e ārahi i ngā whakataunga o te poari mō ngā tau e toru kei mua i te aroaro. E rima ngā aronga o tēnei mahere i takea mai i ngā kaupapa i whakarārangihia ai e koutou.

E hiahia ana koutou i te ohaoha ā-rohe e hīkaka ana, e taurikura ana - he wāhi e taea ana e ngā pakihī te whakatū mahi mō ngā tāngata o konei, he wāhi e korikori ana ngā pokapū arumoni, he wāhi pai ki te hokohoko, ki te whakangahau, ki te whakatā. I kī mai koutou he mea nui te whakamana i ngā iwi me ngā kaupapa kanorau.

E hiahia ana koutou i te Papakura; e rongo ai te tangata i te whanaungatanga, e taea hoki e te tangata te takahi i te ara tinana ora; e kaha ana te pūnaha hāereere kia ngāwari te whakamahi; he rori, he ara eke paihikara e kaha tūhonotia ai.

E hiahia ana koutou kia whai mana nui, kia tino tiakina, te taiao me ngā kaupapa tuku iho hei painga mō ngā reanga e haere ake nei. E kaha tautokona ana e koutou te whakamārōtanga o ngā herenga ki te iwi Māori kia hua mai te tuakiri taurikura i Papakura.

E whakaae ana mātou ki te wāhi nui o te mana whenua ki ngā whiringa ki te tarae i te āpōpō houkura mō Papakura, ā, ka mahi pokohiwi ki te pokohiwi mātou ko te iwi Māori o tēnei rohe ki ngā kaupapa e hāngai pū ana ki a rātou.

Te tū kaha i tēnei ao hurihuri

Mā te mahere nei, ka whakapaua e te poari ā-rohe ngā pūtea ki ngā kaupapa ki te whakaea i ngā whāinga o roto i ngā wawata matua e rima mō Papakura. E ngātahi ana te rere o ngā kaupapa nei ki ērā kaupapa o te Auckland Plan, he mahere e whakarautaki ana i te rohe whānui hei ngā 30 tau kei mua i te aroaro.

Heoi, ahakoa e rite ana ngā wawata ā-rohe, kua huri tō tātou ao i te urutā MATE-KORONA. Nāna i panoni ai ngā āhuatanga me ngā rā whakakōkiri mō ētahi o ngā kaupapa.

I te taumaha kē ngā tahua pūtea, ā, nā te hekenga iho o te moni e rere mai ana nā runga i te urutā, ka taumaha kē atu. Kei te āta whakarārangi i ngā kaupapa hei whakapau i ngā pūtea, heoi, me titi ngā waewae ki te whenua i te mea kāore ngā mea katoa e ea ai. Kaua mā te takitahi e ea ai. Hei ngā toru tau kei mua i te aroaro, ka ngana mātou ki te toro atu ki ētahi atu rōpū ki te whakatinana i ngā kaupapa e taea ai te whakatinana.

Nā te urutā i hōhonu ake ai ngā whakawhitenga kōrero mō te whakakaha i ngā hapori ki te kaupare i ngā taumahatanga. Ka aro ngā kaupapa ki te whakangāwari i ngā taumahatanga o ngā raru āhuarangi, heoi, ka whānui tonu te titiro ki ngā painga ka taka iho i ngā hapori urutau ki te kaupare i ngā taumahatanga me ngā aupēhi o te wā.

Kotahi te mea e kore rawa e memeha - ko te wairua kaha o Papakura. I whakakotahi atu ngā rōpū ringa raupā o te hapori i te pānga mai o te urutā MATE-KORONA. Te tao kai, te whakarite pouaka kai, te hoko kai i ngā toa hokomaha, te whakarite wāhi noho, te āta tiaki i ngā koeke me te hunga pānekeneke - he tauira katoa ēnei o te hapori e tiaki ana i a ia anō i te motu e noho taratahi ana. I whakahīhī mātou i ngā mahi rangatira i taua wā - e hiahia tonutia ana aua mahi rangatira ki te āwhina i ngā tāngata ki te tū kaha anō ai.

E kitea ana i tēnei mahere te whakapono, mō ētahi mea - mā te mahi takitini e ora ai te hapori. Koia i ngana ai mātou ki te whakamana, ki te akiaki i ngā rōpū hapori ki te tarae i te ara whakamua ka tahi, ki te mahi ngātahi mai ki a mātou, te poari ā-rohe, ka rua.

Mā tō rourou, mā tō mātou rourou, e ora ai a Papakura hei wāhi noho, hei wāhi mahi, hei wāhi ngahau.



Brent Catchpole

Heamana, Poari ā-Rohe o Papakura

He whakarāpopotohangā o ngā kaupapa matua o te mahere

Whakaotinga tahi: He ohaoha ā-rohe ngangahau, taurikura hoki

He rohe taurikura, he pakihī e korikori ana, e taea ana te whakatū i ngā mahi mō te hunga e noho ana ki tēnei rohe. He tino wāhi ngā pokapū arumoni hei wāhi mahi, hei wāhi hoko, hei wāhi whakatā mō koutou ko ō hoa, ko tō whānau.

Whakaotinga rua: He hapori e whakahaumakotia ana e tōna kanorau, e rongo ana ngā tāngata i te honohono, he oi, he hauora te āhuatanga o te noho

He rawe ngā pāka me ngā wāhi ki te whakangahau i te tangata. Ka hui tahi ai tātou ki ngā hui ngahau me ngā kaupapa e whai wāhi ai ngā tāngata katoa me ngā iwi katoa.

Whakaotinga toru: He wāhi pai te honohono, he ngāwari te neke haere

Kāore ngā rori e muia ana ki te motukā, he ngāwari, he tika hoki te rere o ngā waka tūmatanui, e tūhonohia ai ngā ara hīkoi me ngā ara eke paihikara, he marutau hoki.

Whakaotinga whā: He taiao, he tukunga iho e kaingākautia ana

He mana nui tō te taiao, tō ngā taonga tuku iho, tō ngā mahi whakarauora, hei painga mō ngā reanga e haere ake nei.

Whakaotinga rima: He rangapū ki te Māori e hanga ana i te Papakura i reira te tuakiri, te ahurea me ngā tūmanako Māori e kauawhitia ana

E whakapono ana mātou ki te whakahirahira o te mahi ngātahi ki te iwi Māori, ki te whakamārō i aua herenga, ki te whakanui i te Māoritanga, kia whai hua nui ai te iwi Māori me ngā tāngata katoa o Papakura.

Whakarāpopotohangā o ngā take pūtea

Ngā whiwhinga pūtea, whakapaunga pūtea, whakapaunga pūtea haumi tōpū o te Poari ā-Rohe o Papakura mai i te 1 Hōngongoi 2020 ki te 30 Pipiri 2021.

Rārangi Tahua Pūtea ā-Tau	2020/21 (\$000)
Whiwhinga moni i ngā mahi whakahaere	
Ratonga haporī ā-rohe	364
Whakarautaki ā-rohe me ngā mahi whakawhanake	-
Ratonga taiao ā-rohe	-
Mahi kāwana ā-rohe	-
Tataunga whiwhinga moni i ngā mahi whakahaere	364
Whakapaunga moni ki ngā mahi whakahaere	
Ratonga haporī ā-rohe	10,506
Whakarautaki ā-rohe me ngā mahi whakawhanake	403
Ratonga taiao ā-rohe	72
Mahi kāwana ā-rohe	969
Tataunga whakapaunga moni ki ngā mahi whakahaere	11,950
More whakapaunga moni ki ngā mahi whakahaere	11,586
Whakapaunga pūtea tōpū	
Ratonga haporī ā-rohe	3,870
Whakarautaki ā-rohe me ngā mahi whakawhanake	-
Ratonga taiao ā-rohe	-
Mahi kāwana ā-rohe	-
Tataunga whakapaunga pūtea tōpū	3,870

Ngā Mema o te Poari ā-Rohe o Papakura

	Ngā taipitopito hei toro atu ki ngā mema
	Brent Catchpole – Heamana Waea: 021 390 430 brent.catchpole@aucklandcouncil.govt.nz
	Jan Robinson – Heamana Tuarua Waea: 021 193 6303 jan.robinson@aucklandcouncil.govt.nz
	Felicity Auva'a Waea: 021 526 941 felicity.auvaa@aucklandcouncil.govt.nz
	George Hawkins Waea: 021 197 7553 george.hawkins1@aucklandcouncil.govt.nz
	Keven Mealamu Waea: 09 301 0101 keven.mealamu@aucklandcouncil.govt.nz
	Sue Smurthwaite Waea: 021 194 0401 sue.smurthwaite@aucklandcouncil.govt.nz



© 2020 Auckland Council
Auckland Council, Papakura Local Board

ISSN 2253-1122 (Print)
ISSN 2230-6757 (PDF)

Auckland Council disclaims any liability whatsoever in connection with any action taken
in reliance of this document for any error, deficiency, flaw or omission contained in it.